

陸氏三立醫驗



三世醫驗卷之三

習醫鈴法

前明吳興陸

桂肖愚著

子士龍祖愚輯

陸

闇生發明

石門後學馬珮志敏夫校刊

國朝同郡後學李

沐素軒重訂

鄞縣後學曹炳章赤雷詳校

產後臀痛成毒治驗一

謝四府尊如夫人分娩旬餘忽于醫處微微作痛延女科金姓者診治之初認為血虛用大料芎歸將十劑而痛不減又以補血當補氣陽生則陰長加人參黃芪五六帖而痛益劇謝公詢房役曰此處世代行醫而有名者或曉此症候汝輩有知即告房役以予對即令人相延予進診其脉兩手六部沉弦而左關尺更緊予問曰夫人之痛不知在左在右抑左右俱痛謝公曰只左邊近肛門一點痛予曰不知痛處熱否曰極熱曰此非氣血不足而痛也乃產後敗血凝滯于肝經腎乃肝經所絡之地流而注之不急治久必成毒謝公曰汝欲用何藥予曰據愚見當行血海之瘀滯解經絡之蘊結庶可消毒于未成矣意殊不

以為然。復延女科。以予方商之。曰。陸公非專科。故妄有此話。丹溪有云。產後須當大補氣血。雖有他症。以未治之。矧今將彌月。有何瘀滯可去。且瘀滯作痛。宜在內而不在外。仍以八物湯投之。忽一日痛處頓腫。金醫畏責。遂薦一外科。療之又過服寒涼解毒之藥。致瘡口不收。大便作瀉。飲食不進。肌肉半削。謝公復令人迎予。曰。向以公非專科。故疑而有此誤。予曰。今外科又非我專門。曰。如此明理。想無所不精。乞用心救之。因診其脉。微細如絲。按之尚覺有神。予曰。今宜大補矣。乃用人參黃芪白朮甘草茯苓加桂附。數劑而瀉止食進。又加當歸熟地。約十帖而瘡口成痂。肌肉復舊。謝公稱為兩世通醫云。

陸闇生曰。醫家望聞問切。俱不可廢。先生問痛在左在右。抑左右俱痛。及至痛在一處而決其成毒。蓋左右俱痛者。血虛也。痛在一處。則著而成癰矣。知者察微。愚者見形。於此可見。

赤痢腹痛溫補治驗二

總捕鞠二府尊。九月間患赤痢。腹痛裏急後重。令人延予。予偶在長興。其公子

視為病勢平常故不追予。另召一醫治之。彼醫極其謹慎。用苓連芍藥滑石。檳榔厚朴等。逐味呈看。撮成二劑。二府煎服一帖。而痛覺增。二帖而痛更甚。連夜至長興促予。是夜鞠公痛不可忍。謂彼醫曰。吾見醫書有云。通則不痛。汝為我用大黃下之。彼醫曰。唯唯。其公子力爭不可。及予到時。日已午矣。公子謂予曰。語云。度日如年。昨夜候公。幾于度刻如年矣。乞進診看。予進視之。見公俯伏牀褥。有呻吟難忍之狀。而面赤戴陽。唇若塗硃。舌白滑無胎。令人細視垢桶有泥血如豆大者數十枚。餘淡黃而澹。診其脉浮按微數而大沉按遲而無力。謂公子曰。此痛乃寒也。當以溫熱解之。公子備述昨夜欲用大黃力爭之故。予曰。幸未服。服則事不可知矣。彼醫在坐。曰。用大黃原非我意。第公欲用溫熱。恐血痢脉大未必是虛寒耳。予曰。脉大為熱。而脉大無力者為虛寒也。痢赤為熱。而色晦便澹者為虛寒也。因用白芍五錢。醇酒炒數次。薑炭二錢。炙甘草肉桂附子各一錢。木香五分。棗二枚。一帖而痛減。能仰臥。二帖而痛止。改加升麻人參黃芪數帖。而後重瀉痢並除矣。

陸闇生曰難經云望而知之謂之神。先生見鞠公俯伏牀褥。已知病因子寒及驗色之晦。脉之無力。而其為寒也。更無疑矣。即面赤唇紅。亦由中寒火不下降。正陰盛格陽之症也。薑附一投而寒痼自愈。

濕腫誤汗成瘥治驗三

鞠公令孫年十一歲。向因水土不服。肚腹作瀉。身體瘦弱。四月中旬天氣蒸熱。淫雨不止。忽患頭面大腫。手足身體微腫。延兒科治之。認為風熱。用蘇葉羌防柴葛升麻等發散之。汗大洩。繼而痰涌吐逆。語言不倫。身體僵直。手足振掉。兒科又認為急驚風。用抱龍鎮心等丸。藥不效。公延予商之。診其脉浮緩而弱。因詢所以致病之由。公備述病情。及兒科之治療。予曰。此病初起。原因脾虛不能制濕。偶值淫雨連綿。濕氣盛行。內濕與外濕相感。而發腫。此時宜以健脾滲濕之藥療之。乃為正治。而反發其汗。升動其臟腑之痰涎。疏洩其經絡之津液。宜其譫妄吐涌。而振掉僵直也。因用六君子湯加歸芍投之一劑。而涌吐即息。數劑而身體柔和。手足定。又數劑精神始爽。後加澤瀉倍茯苓。數十劑而腫消泄止。



陸闇生曰陽氣者精則養神柔則養筋誤汗亡陽語言不倫無以養其神也
症症角弓反張無以養其筋也先生始終以六君子為主先回其陽氣少佐
歸芍亦無陰則獨陽不生之意氣血既充而後徐議滲濕標本俱治法則井然

血崩屢補治驗四

長興王笠雲尊堂年四十九歲經事已止半載一日忽然暴至血流不止予偶
在姚家笠雲相延比至已昏暈不省人事手足厥逆診其脉兩手沈微如絲急
以八物湯加附子薑炭煎灌之時餘方醒連服二大劑血止十之七八又相繼
服至十劑六晝夜方止數月後血崩又大作亦昏暈彼處醫家以犀角地黄湯
加藕節阿膠之類不止又延予診其脉仍沉弱以附子乾薑鹿茸俱燒存性同
釜底墨酒調服之其血即止後以六味地黄丸加四物料服約三斤一年不發
次年八月又暴至昏暈比前更久予又偶在雉城急來相延予診之兩手亦復
如是仍以大劑八物湯加附子連服二劑自日晡昏暈至黃昏而氣未甦觀者
以為必死予屢進診之決其必甦蓋氣血暴脫一時補劑未能與胃氣相迎耳



笠雲私延彼處醫家診視投以牛黃丸至半夜人事稍省而血尚未止明早予不知其另延醫治之故診視後仍到八物湯少加薑附二帖而彼醫適至云昨夜之甦乃牛黃丸之功公實不知也向因屢服參附以致血崩屢發令人事既省斷宜以順氣行瘀去其發病之根豈可復蹈前轍予曰昨早投大補之藥即不服牛黃丸亦甦此等脉症急宜續投參芪少緩恐成不救豈可更以他藥乎笠雲猶豫而素重予之家學姑從予言彼醫怫然而去曰讀父書而抗趙卒天下每多此人予令先服煎劑隨照前製附子等味存性午後人事更爽食粥晚服末藥一服夜間血得少止明日又湯散並投血竟不來予留前湯十帖而歸十日後笠雲出謝飲食身體已復元矣

陸闇生曰婦人血不止謂之崩崩者取象于山土虛不固然後山崩未有土實而反崩者人身氣血相依而生血之崩也由氣虛不能攝血以致不歸經而妄走非峻補其氣能保其不復發乎此等治法人亦有知之者第當垂絕而決其必生既甦而復投以溫補皆家傳之確見也

瘧後變痢治驗五

王笠雲八月間患瘧服藥已愈後則飲食不調大便瀉而變痢一日夜約二十行皆積滯無冀腹痛後重身熱夜不安卧彼處醫家以苓連木香枳榔等藥投之痢益甚予診其脉左手浮弦而弱右手沉數而微予曰此瘧之餘邪也當清解經絡中邪熱則大便自固今但治痢宜其難愈乃以機要防風芍藥黃芩湯加柴胡二帖而腹痛身熱頓止後服調氣養榮湯數帖而精神如故

陸闇生曰經云病發而不足標而本之王公之症瘧為本痢為標浮數之脉雖有邪熱而微弱乃是不足先生治病之本而標亦愈

胎孕子癰治驗六

謝四府尊令愛與乃坦俱在任青年初妊將及七月矣日間責一婢大怒又與夫反目號哭半日夜即不能寐至夜半忽口中譏語不已目竄上視竟于床褥中裸形而出其夫力抱之遂昏憤不知人事問之不語即于是夜令人延予予適往德清乃延一醫進看不識何病署中人多以為祟謝公夜起着紅袍執劍壓

之而號咷嘻笑千端萬狀急令人到德清促予來比至悉其病狀予令數婦女
執定其手診之六部弦洪有力予曰此子癰症非祟也謝公曰曾有此否予曰
此亦姙孕所特有但令愛發太甚耳用真正霞天麴貝母黃連山梔天麻青皮
白芍龍胆草青黛加燈心竹瀝一帖而和二帖愈其半四帖而疾盡愈及問其
兩日間景狀毫無所知

陸闇生曰孕至七月氣血壅滯津液不能流通未免聚為痰涎加之盛怒木
旺生火火并痰湧聚于包絡包絡為痰所擾斯心亦不能自主成此癰症惟
大瀉心肝之火火息則痰平痰平而諸症悉愈

瘡癰燥補治驗七

徐縣尊于秋末冬初遍身生癰大小不一紅腫焮痒黃水淋漓延一外科療之
認為風熱用防風通聖散數帖不減又一外科曰諸痛痒瘡瘍皆屬心火用芩
連山梔生地等味將十帖痛痒膿濕益甚且胃口日弱飲食漸減告假月餘鞠
二府尊悉其病狀令人延予至縣診視其脉浮按微數沈按中按皆緩而弱徐

公曰瘡痒非風熱即心火當無外此兩端向一外科以風熱治之而不效又一外科以心火治之而亦不效何也予曰風熱大都為癰疹未必為瘡癤至瘡瘍之為心火內經言之第脉微弱為多此元氣不足也緩者濕也數雖為熱而微數不可純責之火蓋據今日之症火為標濕為本而原當日得病之由又濕為標元氣不足為本此必因乘虛汗出澡浴濕漬肉腠久而熱蒸蝕為膿水發為痛痒也徐公喜曰先生已照病情矣乞處一方治之因用蒼朮以仁茯苓燥濕為君人參白朮黃芪甘草補氣為臣連翹蟬蛻清熱為佐葛根白芷走入陽明肌肉為使二劑痛痒頓減胃口稍開十劑成痼而體復舊

陸闇生曰內經云汗出見濕乃生痱瘡王註曰小者為痱大者為瘡今瘡癤大小不一正所謂痱瘡也汗出已為陽氣之不固況乘虛乎汗而澡浴正汗出見濕也先生熟于內經故灼見病源如此

辨聲啞非療治驗八

范肖麓令郎厚味奉養而酒量極高性尤偏嗜每夜沈酣且多怒氣初患吐血

醫者以犀角地黃湯等劑投之月餘不愈更增溺血咳嗽一日忽然聲啞然肌肉如故飲食守禁忌而未嘗減屢更醫者俱以為瘵用藥大同小異從無一效祭酒屏麓公素重先君再四邀予往診備述病狀及醫藥罔效且曰此等病症令先尊治療必多諒有秘而傳之兄者予曰先君治病隨症用藥未嘗執方豈有秘而私傳乎第審症治病之法不肖畧得一二耳乃令視脉診得左關洪大而弦右關滑大而數予曰令孫乃有餘之火症非不足之瘵症也此因厚味生痰胃家素不清滯兼之好酒酒性屬火火炎痰涌壅滯肺中所以聲啞其血上下行者怒則傷肝肝脉挾舌本而絡陰器龍雷之火一動血隨之而上逆下洩矣法宜清熱降氣化痰導血歸原十日可愈若認為瘵而以地黃二冬等滋潤之藥投之無論肺氣不得清即肝氣亦不得平矣祭酒大喜曰聆兄緒論令尊可謂不死矣乞求處方因用霞天麴山查肉理胃家濕痰為君杏仁橘紅利肺竅桃仁鬱金行肝氣為臣山桅生甘草清上焦為佐滑石車前清下焦為使又用茅根煎湯代水煎藥數劑而血止聲清不十日諸症如失祭酒稱曰世濟其美

陸闇生曰金空則聲鳴肺屬金而主聲痰滯肺竅金不空矣聲何不啞木藏則氣逆肝屬木而藏血怒動肝火木不平矣血何不動此症俱宜責諸飲食而七情當為末減蓋貧賤人之怒以不得發而成鬱其受病深富貴人之怒以易逞志而過恣其受病淺至厚味酒醴每多中于富貴之人故先生雖分釋病因而用藥以清肺胃為多也

痰疾涌吐治驗九

潘天泉公大令即元石家庭有拂意事怒極而不得發日夜以酒自遣遂患吐逆飲食半留半吐嘔甚吐物似痰非痰似血非血膠稠而色褐胸脇脹痛徹背初起醫以翻胃治之不效反加潮熱煩躁後一醫以肺癰治之用知母貝母花粉薑仁等藥而飲食日減吐嘔痛脹益劇醫者見吐出之物咸謂肺爛不可治天泉與客私語曰此病若養愚尚在何至不可治有知予者曰養愚令即之學不減乃父也天泉公致書迎予極敘先君交知之雅今日求治之誠比予到公道故後邀予進內診視間適大嘔時許出物如前元石指以示予曰因吐出之

痰色如此故諸醫謂予肺爛恐不可治矣予聞其飲食已減而肌肉不甚削吐
出之物可畏而聲音不改及診其脉兩寸滑數左關弦右關滑兩尺平予曰凡
之肺非壞第不知近日有鬱怒否元石曰病正由此予曰予已悉兄之病情矣
右關滑相素有疾左關弦鬱怒之故也怒則血菀于上與痰膠結壅塞于心肺
之間故兩寸滑數也嘔之不易出者火也脹痛者正所謂濁陰不降則生脹
也法當涌之元石有難色出語天泉公撫掌曰此真養患治法也任君為之因
用常山五錢紅花五錢酒二碗煎一碗令通口服之一涌而出初見褐色痰塊
後多紫黑約有盆許胸膈頓寬背亦不痛食粥甚甘亦不作嘔矣後以清氣養
榮湯調理之

陸闇生曰肺者氣之所自出也若視痰色幾不辨其肺之壞與不壞矣第肺
壞聲必啞今問答聞聲音不改則非肺壞可知且肺壞由心火制金火亢由
水不制火令兩尺平和腎水未竭自能救母肺何由而壞嘔吐而反涌吐之
乃通用之變局也沉水鬱宜達涌吐者亦達肝氣之意也

痢用補塞治驗十

吳南坵老先生八月間醉飽後有使內之事。明日患痢。一日夜百餘次。赤白相間。狀如爛肉。腹中溫溫作痛。四肢厥冷。診其脉緩大無力。兩尺尤弱。予曰。此症即宜補塞。處方先書人參肉果二味。其諸公子見之大駭曰。無積不成痢。豈有一二日即用補塞者乎。乞老先生再詳之。予不得已。姑以調氣養榮湯與之。不進不退。明日又診視。予曰。還宜急為補塞。諸郎又力爭。仍以前湯加人參。而彼竟不加。亦無進退。予適為渠族中延去。諸郎又另延一醫。投以芩連檳榔木香等藥。腹痛如錐。足厥如冰。冷汗時出。氣乏不足以息。所食之物即從大便而出。色竟不變。半夜令人迎予。備述病劇景狀。而不用人參。與服別藥。竟隱而不言。予曰。固知尊公之病未愈。第以前方加人參服之。何至勢劇。乃爾。此必不加人參。或服別藥之故。方始承服。予曰。此真不可為矣。欲辭去。諸公子跪拜備至。而夫人亦出堂欲拜。不得已。進而診視。身體不能轉側。大便如流。勢甚危險。而脉與神氣尚未絕。因用大料人參附子理中湯。加肉桂肉果投之。一帖而腹痛少。

減數帖而足溫泄少止。後用人參二斤。始起鬚髮盡落。

陸闇生曰。病有反治。有正治。有常治。有變治。痢而通因通用者。反治也。通用塞者。正治也。然初起用通者。常治也。初起即塞者。變治也。知反知正。尤宜知常。知變。方為大醫。吳南邱諸公子。執無積不成痢之常。而不識導君脉症之虛。若非神手。幾敗乃公事矣。

腹飢好肉屬蟲治驗十一

陳曙光患心飢。必食肉方解。若覺飢不食肉。則徧腹淫走。并身體如在空中。不可支。每食肉初一塊。必滿心。如箭攢作痛。至數塊方定。少則頻肌。多則脾虛。不能克化。且作瀉。閱醫者數人。將及半年。肌削骨立。家人親友俱視為鬼神為祟。祈禳已遍。偶其兄雲車與予會于華林。述及乃弟病狀。曰。此症恐神仙亦不能療也。予曰。若非死症。豈有不可治之理。由人不識耳。遂拉予同歸。家人與曙光因屢藥不效。以為多事。勉出就診。予診其六脉皆弱。而浮沉大小遲數不等。且不常。其面黃而帶青紋。予曰。此症易識。何前醫如此束手。雲車問何症。予曰。此

蟲之為患。非死症。亦非鬼祟。予可力拯之。用史君子肉半斤。精猪肉半斤。同煮。俟肉極爛。去史君子。入膩粉一錢。連汁頓食之。初喫。一如箭攢。食後半日。不飢。至五更。瀉盆許。皆蟲。有全者。有半爛者。間有活動者。宿病頓除。後以參苓白朮等調理之。禁其一年不食肉。半月許。曙光偕兄率子登門謝再生云。

鬱痰腹脹治驗十二

李安吾尊正。素不生育。及安吾納寵。俱受孕。俱生子。出痘。妻之子生。而已子死。悲憂彌月不已。遂胸脇脹痛。夜不安卧。卧必先令人於背上搥數百拳。方得就枕。片時卧不能仰。仰則氣涌而喘。飲食半減。肌肉半削。月事不行。已數月矣。予診其脉寸沉而數。關沉而滑。尺沉而弱。予曰。脉與病情極相應。鬱火成痰之症也。用調氣養榮湯。加白芥子。倍霞天。麴療之。數劑。胸脇少寬。卧可仰。亦有時不必搥。第大便五日不行。小腹脹急。與滾痰丸二錢。又懼元氣不足。改用補氣養榮湯二劑。大便初去燥屎數枚。後出皆痰積。脹痛少減。後以補葯相間。調理月餘而愈。



陸闇生曰悲思則氣結氣結則津液聚而為痰氣鬱故六脉皆沉有痰故關滑痰能生熱且氣逆則上焦之火不得降故寸數月事不來者血不足也故尺弱先生調氣消痰而必兼養血為主此標本兼治之法也

脫肛鼻衄治驗 十三

李安吾令姪年十三歲大腸燥結不時脫肛鼻中結塊不時出血平日自喜讀書病亦從辛苦而得常延小兒科療治已閱兩年每當辛苦必發安吾極愛此姪因乃正病痊領至城中就予診視骨瘦如柴面紅身熱其脉細數予曰此天稟火燥之症若破身之後便是勞怯矣此時急宜治之戒厚味節誦讀而後服藥以却之庶可瘳耳因定一方用天麥二冬各一斤生地半斤人參四兩即加減三才膏也服一料其發甚稀服三料將一年而愈

陸闇生曰鼻者肺之竅大腸者肺之腑童年攻苦心氣有餘心血必耗血衰大旺金受其刑故上下結燥用二冬滋金清火以治其標火燥有餘元氣必不充足脫肛出血皆元氣不能統攝故也故用生地引人參以培天一生氣